



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato:

8. februar 2012

J.nr.:

01.31.06/12-00567

Aningaasaqarnermut Naalakkersuisoq

Suliami nr. 01.31.06/12-00567 ataasinngornermi ulloq 6. februar 2012 Aningaasaqarnermut Akileraartarnermullu Ataatsimiititaliap aalajangernera pillugu Naalakkersui-sunut ilisimatitsissut

2012-mut kiffartuunneqarnissamik Sisimiut Fish ApS-mik isumaqatigiissutip akuerineqarnissaanik qinnuteqaat

Naalakkersuisut **inassutigaa**,

- Sisimiut Fish ApS-imit 2012-mut 1,262 mio. kr.-inut kiffartuunneqarnissamik isumaqatigiissut ilanngunneqartoq taamatut isikkoqarluni akuersissutigineqassasoq
- 2012-mi 1,262 mio. kr.-it kontumit pingaarnermit 50.01.18-mit Ingerlatsinissamut isumaqatigiissutit, Tunisassiorfiit tiguneqassasut.

Aningaasaqarnermut Ataatsimiititaliap oqaaseqaatai

Kiffartuunneqarnissamik isumaqatigiissut nassiunneqartoq ukiumut aningaasaliiffiusumut 2010-mut tunngatillugu Aningaasaqarnermut Ataatsimiititaliamit ulloq 22. marts 2010-mi akuersissutigineqartup annertuutigut assigaa (Suliaq 10-467). Isumaqatigiissummulli siusinnerusumut sanilliullugu aalajangersakkatut nutaatut ilanngunneqarput § 4.2, § 5.3 aamma § 7. Minnerunngitsumik § 7-ip, naammassininngitsoornermut tunngasup, isumaqatigiissummut ilanngunneqarnera naapertuuttutut isigisariaqarpoq.

Kiffartuunneqarnissamik Royal Greenlandimut aamma Arctic Green Foodimut siusinnerusukut isumaqatigiissutaasut akuersissutigineqarnerannut atatillugu Aningaasaqarnermut Ataatsimiititaliap kaammattuuteqarneratigut ”*Nunaqarfinni tunisassiorfiit pillugit sullissinissamut isumaqatigiissutinik nalilersuineq*” Deloitte 2011-imi ukiakkut suliaara.

Kiffartuunneqarnissamik isumaqatigiissutissatut missingiusiami matumani pineqartumi ilanngunneqarsimasorinangitsunik kukkunerisuisoq nalunaarusiami ilaatigut ima kaammattuuteqarpoq:

- Kiffartuussinissamik isumaqatigiissummik suliaqarnermi suliffeqarfissuup tunisassiorfiutai tamarmiusut ataatsimut isigineqartassasut (immikkoortoq 2.3), taamaaliornikkut ingerlatat amigartooruteqarfiusut kisiisa pinnagit suliffeqarfissuulli tamakkiisumik angusaanut sanilliullugit tapiissutit annertussilerneqartassallutik. “Suliffeqarfiup iluani sullissinernut akigitinneqartut” aqutigalugit aqqissuussinerit pinngitsoortinneqarnissaat kukkunerisusup kissaatigisimagaa qularnangilaq, taamaattoqartillugu aalisakkat tunisassiorfimmu pisortanit tapiiffigineqartumut tunineqartarput, tamatumalu kingorna tunisassiorfimmu tapiiffigineqarneq ajortumut aalisakkat nuunneqartarput, tassangaanniillu immaqqa suliareqqinneqareerlutik iluanaaruteqarluni tunineqartarlutik.

Tassunga atatillugu malugeqquneqassaaq ingerlatseqatigiiffissuaq Sisimiut Fish 2010-mi akileraarusiisoqartinnagu ingerlatsinermini 540.770 kr.-inik angusaqarmat – tassa

- sinneqartooruteqarluni. Ukioq taanna ingerlatseqatigiiffissuaq 1.250.000 kr.-inik tapiissutisivoq.
- tunisassiorfinnut ataasiakkaanut pingaarnertut anguniakkanik anguniakkallu immikkoortuinik sukumiisumik allaaserinnineq kiffartuussinissamik isumaqatigiissutini ilanngunneqartariaqartoq, taamaalilluni tunisassiorfiit ataasiakkaat niuernerq tunngavigalugu ingerlanneqarsinnaanerit pilersarusiorfigineqassalluni (immikkoortoq 1.3).
 - missingersuutigineqartumit pitsaanerusumik angusaqarsimagaanni tapiissutitut isumaqatigiissutigineqartup assersuutigalugu 10 20 %-ianik iluarsiiisuteqarsinnaaneq kiffartuussinissamut isumaqatigiissummut ilanngunneqartariaqartoq. (immikkoortoq 3.2). Tamatumani siunertaavoq tapiissummik sapinngisamik annertunerpaamik pissarsinisaq siunertaralugu ingerlatsinermut missingersuutini saqqummiussaminni ingerlatseqatigiiffiit minnaaralutik missingersuusiornissaasa pinngitsoortinnissaa.
 - Aningaasartuutit suut missingersuutitut ilanngunneqarsinnaaneri ilanngunneqartussaanninnerilu pillugit nassuiaatinik sukumiisunik suliaqartoqartariaqartoq. Ataat-simoortumi aningaasartuutit (taamaattoqassappat) missingersuutitut ilanngunneqarsinnaaneri erseqqissaatigineqartariaqarpoq. Tunisinermi akit annertussutsillu kii-salu tuniniaanermi akit annertussutsillu qanoq naatsorsorneqarnissaat missingersuusiorneqarnissaallu pillugu najoqqutassiisoqartariaqarpoq. (Immikkoortoq 9). Tamatumani siunertaalluni missingersuusiortaatsimik ataatsimoorussamik kiffartuussinissamik isumaqatigiissutini tamani atorneqarsinnaasumik suliaqartoqarnissaa.

Immikkut oqaatigineqassaaq kiffartuunneqarnissamik Arctic Green Foodimut aamma Royal Greenlandimut isumaqatigiissutit pillugit suliaq 11-563-imi ulloq 9. december 2011-imi aalajangiinermi Aningaasaqarnermut Ataatsimiititaliamit uparuarneqarmat kukkunersuiisup nalunaarussia Naalakkersuisunit ima kingusitsigisukkut aatsaat naammassineqarlunilu nassiunneqarmat ingerlatseqatigiiffiit taaneqartut marluk kiffartuussinissaaq pillugu isumaqatigiissuteqarfigineqarneranni atorneqarsinnaanani. Ataatsimiititaliaq nangilluni oqarpoq siunissami kiffartuussinissamik isumaqatigiissutitut allanut kukkunersuiisup kaammattuutai najoqqutatut atorneqarsinnaasut. Naatsorsuutigineqarpoq Naalakkersuisut taamatut kaammattuuteqarneq malissimassagaat.

Sisimiut Fiship 2010-mut naatsorsuutai qinnuteqaammut annertuumik tunngavigineqarsimasorinarput. August 2011-imi, tassa qaammatit tallimat matuma siorna, kilonngorlugit tunisanut paasissutissat ataasiakkaat ilanngunneqarsimagaluarput, kisitsisilli taakku aallaavigalugit inerniliisoqarani. Taamatutaaq kisitsisit taakku tapiissutissatullu naatsorsorneqartut 1,2 mio. kr.-it imminnut attuumassuteqarnerat erseqqissumik takuneqarsinnaanngilaq.

1. Ataatsimiititaliap Naalakkersuisut qinnuigaat pissutsit qulaani taakkartorneqartut tamaasa immikkut isummerfigeqqullugit. Tamatumunnga atatillugu kissaatigineqarpoq, taannaannaanngitsorli, ilisimatitsissutigineqassasoq kukkunersuiisup kaammattuutai qulaani taaneqartut ataasiakkaat tamarmik kiffartuunneqarnissamik isumaqatigiissut matumani pineqartoq eqqarsaatigalugu qanoq aalajangersimasumik timitalerniarneqarsimanersut. Tamatumani ilaatigut eqqarsaatigineqarpoq isumaqatigiissutini iluarsiiisuteqartarnissamut periaatsimik aalajangersaasoqartarnissaannik kaammattuut, tamatumani siunertarineqarluni suliffeqarfiit kiffartuunneqarnissamik isumaqatigiissutini pineqartut Nunatta Karsianit annertunerpaamik tapiissutisnissaaq siunertaralugu piviusut akimorlugit ajornerusunik isikkulinnik missingersuusiortanninnissaat.

2. Kiffartuunneqarnissamik isumaqatigiissutissatut missingiut matumani pineqartoq kukkunersuiisumut oqaaseqarfigitinneqarsimava, Naalakkersuisullu, tamanna pisimassanngikkaluarpat, siusinnerusukkut kaammattuutaasarsimasunut sanilliullugu kiffartuunneqarnissamik isumaqatigiissummut missingiut kukkunersuiisumut nalilertinniarpaat?

Ataatsimiititaliap paasivaa Arctic Green Foodimik aamma Royal Greenlandkik kiffartuunneqarnissamik isumaqatigiissutit siunertarisimagaat ukiut marluk ingerlaneranni nunaqarfinni tunisassiorfiit ingerlaannarsinnaanissaminnut aningaasatigut tunngavissinneqarnissaasa qularnaarneqarnissaa, piffissaq tamanna qangiuppat Naalakkersuisut naatsorsuutigalugu taakku niuernermi nalinginnaasumik atugassarititaasut naapertorlugit ingerlanneqarsinnaalernissaat. Tamanna naapertorlugu siunertamut aningaasanut inatsimmi ukiunut aggersunut aningaasaliissutit ikilisinneqarsimapput. Taamaattorli ataatsimiititaliaq isumaqarpoq kiffartuunneqarnissamik isumaqatigiissummi matumani siunertaq erserlunlunnersoq.

3. Ataatsimiititaliap paasilluarsinnaavaa 2012-imi suliffinnik ataavartitsinissaq anguniarneqarmat, tamatumani kingorna qanoq pisoqassava sunalu tunngavigalugu? Apeqqummut tassunga atatillugu kiffartuunneqarnissamik isumaqatigiissutini tunitsivinnut ataasiakkaanut pineqartunut anguniagassanik tamarmiusunik immikkoortunillu aalajangersaasarnissamik kukkuniarsuisut kaammattuutaat isiginiarneqassaq, taamaalilluni aamma kiffartuunneqarnissamik isumaqatigiissutit annertunerumik *angusassanut isumaqatigiissutit* isikkoqarnerulerniasammata.

4. Naalakkersuisut piviusorsiorlutut isigaat tunitsivinni kiffartuunneqarnissamik isumaqatigiissummi pineqartuni qaquguluuniit akilersinnaasumik ingerlatsisoqalersinnaanera?

Ataatsimiititaliaq isumaqarpoq 2012-imut tapiissutinik tunniussinissap utaqqisinneqarnissaa tunngaviusumik isumaliutigineqarsinanasoq, 2012-imut Sisimiut Fish ApS-imut naatsorsuutaagallartunilluuniit tigusaqartoqarnissaata tungaanut.

5. Ilisimatitsissutigeqquneqarpoq naatsorsuutit pineqartut qaqugu pissarsiarineqarsinnaanissaat naatsorsuutigineqarnersoq.

6. Tamatumunnga ilanngullugu aamma ilisimatitsissutigeqquneqarpoq suliffeqarfimmut kiffartuunneqarnissamik isumaqatigiissuteqarnissaaq siunertaralugu isumaqatigiinniarnissat naatsorsuutit pineqartut pissarsiarineqarnissaannut utaqqineqassagaluarpat tamanna tunitsivimmut tunisaqarsinnaanermut ajortumik kinguneqarsinnaassanersoq, minnerunngitsumik nipsisat suaannik tunioraalernissaaq eqqarsaatigalugu.

Naggasiullugu oqaatigineqassaaq kiffartuunneqarnissamik isumaqatigiissummi § 3.3 paasinanngimmat. Taamatuttaaq § 5.2-mi “toornerujussuarimi kingullermi” § 5.2-mut innersuussut kukkusoq ilimagineqarpoq; § 5.1 innersuussutigineqartussaasimagunarpoq. Aalajangersakkat ukiut siuliinit ingerlateqqitaapput.

7. Tamatumunnga Naalakkersuisut qanormita oqaasissaqarpat.

8. Ilanngullugu kissaatigineqarpoq ilisimatitsissutigeqquneqassasoq siusinnerusukkut kiffartuunneqarnissamik isumaqatigiissutaasarsimasutigut pissarsiaasartut Naalakkersuisuni qanoq nalilerneqartarsimanersut, taakkulu isumaliutinik iliuusissatullu pilersaarutinik aalajangersimasunik sunik pissutissaqalersitsisimanersut?

Aningaasaqarnermut Ataatsimiititaliap aalajangernera

Qulaani apeqqutinut taaneqartunut Naalakkersuisut akissutissaasa utaqqeqqaarneqarnissaat siunertaralugu Naalakkersuisut inassuteqaataannut isummernissani Aningaasaqarnermut Ataatsimiititaliap **kinguartippaa**. Naalakkersuisut akissuteqaataat Aningaasaqarnermut Ataatsimiititaliap ataatsimiittarnissaminut pilersaarutaa uani nassaarineqarsinnaasoq <http://www.ina.gl/udvalghome/finans-og-skatteudvalg/moedepan.aspx> piffissaq eqqarsaatigalugu isiginiarlugu nassiteqquneqarpoq. Naalakkersuisut akissuteqaataat kalaallisut qallunaatullu nassiteqquneqarput assilinera qarasaasiakkut uunga nassiullugu nch@ina.gl.

Ataatsimiititaliaq sinnerlugu

Andreas Uldum
Siulittaasoq